



# Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 8

Yangia anidakangma :

f Tir Yimiyim

Instagram tiryimiyim@aolima

YouTube tir yimiyim

TAPAK 3

West Ham United-i defender  
Konstantinos Mavropanos alizükogo

"Onoki Alliance tenung Bharat melenra parnoki  
linük dang BJP ajatsü asü?" Arvind Kejriwal



VOL. XX NO. 325 (ADOK 325) DIMAPUR RASEMNÜ (WEDNESDAY) RONGJUI (SEPTEMBER) 06, 2023 ₹ 5.00

## Nagaland nung school ajak Honibar anogo sodi asütsü *Tesayur 18 nem tetushi agütsü; School Children Health Card amshitsü*

**Kohima, September 5, 2023 (TYO):** Nagaland nung tesayur 18 nem tetushi balaka agüja Teachers' Day mongogo. Sorkar school nungi tesayur 13 aser nija school nungi tesayur 5 nem tetushi agütsü.

NBCC Convention Hall nung state level Teachers' Day sentong nung parnok nem tetushi agütsü. Sempet angur shiai Rs 15,000 aser kulikaket kaka nguogo.

"Tanü tesayurtem hao ta mali aser tenüngsang magütsür saka nisung ajaki loktiliba tarutsü yangerba nung tesayurtemi tongtipang shilem agiba angatetsüla" ta School Education and SCERT Advisor Dr Kekhrielhoulie Yhome-i o jembidang ashi.

"Tang nungi aser talisa nija schools nung Honibarnü class magütsü. Honibar ya sodi anogo ama amongtsü kechiyong tesayurtem ya alartem masü aser parnoki hopta nung anogo 6 tashi lesson sayua mamongtsü" ta Advisor Yhome-i ashi.

"Tesayurtemia parnok kibong den mapang endoktsüla. Tanurtemia classroom kima mapang endoktsüla aser yamaji asü nung dang parnok kechisarena ajaklen terenlok alitsü" ta paisa shisem.

Government High School tem nungi arurtem nem GHSS nung mezüing admission maongka agütsütsüla. Iba atema sorkar school tem tsüingda Memorandum of Agreement ka nung sign süteptsü ta Advisor Yhome-i metetdaksü.

"Nagaland nung kaketshir lakh 4 shi ka lir aser iba nung sorkar school tem nungi kaketshir lakh 1.5 aser tanüngbaji nija school tem nung lir. Sorkar tesayurtem ya tajungtiba aser



September 5, 2023 nü Nagaland state level Teachers' Day sentong nung School Education & SCERT Advisor Dr. Kekhrielhoulie Yhome-i State Level Teachers Award, 2023 angurtem den külemi agiba noksa angur.

parnok nem itasen tajungba agütsür anungji parnoki kaketshirtem junga anitetsüla aser kaketshirtem atsür arutsüla" ta paisa ashi.

Taruba academic session nungi nija aser sorkar school tem tsüingda Sports Week alitsü. District-wise nungi Inter-district aser ano All-Nagaland Sports Meet ayongzüka agia kaketshirtem anitetsü, ta paisa shisem.

School Education Department-i Nagaland Olympic Association aser Nagaland Olympic Association den Common Sports atema jembitepdar, ta Yhome-i ashi.

Paisa yimtsüing nung alia school tem asükwa aser lemlia asadanger Class yakta tenzüka agütsü atema ayongzü. Iba ajanga anepdang amajok nung mapang meindoktsü ta paisa ashi.

Sangküm nungi School Children Health Card amshitsü aser iba ya Department of Health and Family Welfare den yaritepa inyaksü. Iba ajanga kaketshir shiai pei school nung temang anepalutetsü, ta Advisor Yhome-

isa metetdaksü.

School nung tekolakpur akhümkedaksütsü asoshi Primary Schools nungi Teacher-in-Charge nüngha agientsü aser taruba academic year nungi nüngha tasen ka agütsütsü. Maneni SCERT, NBSE, Samagra Shiksha aser tanga line den asüingdangteper Common Teachers Training alitsü ta paisa ashi.

"Sorkar school tem nung

tesayur peria maliba khuret atema department-i yakta tesayurtem lemsashiba tetuyuba agütsütsü anungji tesayur ajaki tashi angaa pei lemsükba tesemi aotsü metetdaksür" ta Advisor-isa ashi.

Drugs ajanga asen loktiliba aser tanurtem dak kongshir anungji school temi Drugs anema mapa inyaksüla aser sorkar nem osang sangoktsütsü ayongzüker ta Yhome-isa ashi.

Tesayurtem nem tetushi agüja Nagaland nung shisaliok reju ajak

State Level Teachers Award, 2023 (order of merit) angurtem :

SNo	Name of Teacher	Designation	Name of School
1	Shri. Shekuto Rhakho	Post Graduate Teacher	GHSS Chozuba
2	Smti. T Kusi Trakha	Graduate Teacher	GHS Phoyisha (Yisi)
3	Shri. Suman Bhagat	Graduate Teacher	GHS Sahuboto, Zunheboto
4	Shri. M. Chemnye Konyak	Primary teacher	GMS Mon Town 'D'
5	Shri. M Phongyei Changkhu	Post Graduate Teacher	GHSS Aboi, Mon
6	Shri. Talitmsu	Graduate Teacher	GHS Yachem, Longleng
7	Smti. I Asenla	Primary Teacher	GHS Yaongyimchen, Longleng
8	Shri. R Ronald Meru	Post Graduate Teacher	GHSS Pungro, Kiphire
9	Shri. N Abenthung Kithan	Graduate Teacher	GMS Mungya, Wokha
10	Shri. Yonga Langpong Chang	Post Graduate Teacher	GHSS Tuensang
11	Smti. Viletuo-ü Sanchu	Primary Teacher	GMS Botsa, Kohima
12	Smti. Martina Sekhose	Graduate Teacher	RGHSS, Kohima
13	Smti. Kikrukhrise? Yhome	Primary Teacher	GPS, High School Area, Kohima
14	Smti. Nath Kumari Sharma	Assistant Teacher	Lornas HSS, Dimapur
15	Smti. Rina Dey	Assistant Teacher	Holy Cross HSS, Dimapur
16	Smti. Regina	Assistant Teacher	John HSS, Tuensang
17	Shri. Diwakar Mishra	Assistant Teacher	Don Bosco HSS, Kohima
18	Shri. Akoon Konyak	Assistant Teacher	Sacred Heart School, Mon

## EGI-i CM Biren o magizüker; FIRs meyipa agütsü ayongzüker

**Guwahati, September 5, 2023 (Agencies):** Manipur Police-i EGI president aser fact-finding team züingsemtem anema FIR benokba aitsür ta Editors Guild of India (EGI)-i metetdaksüog.

Maneni Manipur Chief Minister N Biren Singh-i EGI anema jembiba aitsür ta parnokisa ashi.

Manipur Chief Minister-i EGI ya sorkar aser linük anemertem ta jembiba atema nemjema bilemer kechiyong India sorkari G20 summit alitsü jakdang alima sabang nung 'democratic principles' aser 'freedom of speech' indang kanga jembir ta EGI-isa metetdaksü.

"Civil society teloktem aser Indian Army ajanga shidi aika züluba nung ajemdaker Editors Guild of India-i mapa inyak. Manipur nung nübo teimba Meitei nunger aser nübo tajemba Kuki-Chin nunger tsüingda rara nung media ajanga tim mesüi shilem agiba ken o bushisüingdangtsü atema züingsem aseme akümba telok ka Manipur-i yok. Parnoki media coverage aser journalist temi tayongzüka ajurubatem asadanga liasü" ta EGI-i

tanü sangdong ka nung ashi.

Iba teshimtet teloki reporters, editors, Editors Guild of Manipur, All Manipur Working Journalists' Union, civil society activists, public intellectuals, rara ajanga timtem ajuruba tetsürtem, lisopur otongdarterm aser Manipur nung security forces ketdangsurtem den ajurutepa sendentem amen.

September 2, 2023 nü EGI fact-finding team ajanga comprehensive report agütsüba ya tensa tamajung ajangshidang media-i shilem tajungba agütsü atema lir ta EGI-isa ashi.

State sorkari iba report nung tebilemstü lemsatepba atema mapa inyaksü melenra FIRs nung Criminal Procedure Code (CPC) benokba atema mepelar. Photo caption ka nung aibelen aliba onoki agizüka metongshiog aser ano maneni olemteptsü mulunga lir, ta EGI-isa ashi.

Iba report indang nükjidong tongtibajibo tensa tamajung nung media-i shilem tajung agütsüba atema lir anungji sorkari FIRs meyipa agütsü ayongzüker ta EGI-isa metetdaksüog.

## RPP-i School Education Advisor nem tenüngsang agütsür

**Dimapur, September 5, 2023 (TYO):** School Education department tia kanga mejungi lir aser Advisor Dr. Kekhrielhoulie Yhome-i ochishia ashiba atema tenüngsang agütsür ta Rising People's Party (RPP)-i metetdaksüog.

Asen lennir aikati tamajung inyakyim ajak miimbanga ayur saka Advisor Yhome-i kanga ochishia jembio aser iba ajanga tanga yimten lennirtem ajungmesotsü imlar ta RPP-i sangdong ka nung ashi.

Nagaland nung department tamajungtiba aser ochimeshitibaji School Education Department ta RPP-i aiben shia aruog. Minister aser Advisor aikati iba department ketdangüsü inyakog saka tang teinyakdak Advisor-i department khuret lemsatepba ajanga tesüiba nung pa jakdang inyakerterm aitsür, ta RPP-isa ashi.

Tesayurtem shimokba mapa ya NPSE mesüra NSSB ajanga meinyaktetsü ta pai ashir anungji 2022 nung RPP-i mezüing shidangba ama department-i

Teachers' Recruitment Board (TRB) ka tentetsü nenshir ta RPP-isa metetdaksüog.

Tesayurtem ya empanelled university professors ajanga interview agia shimtsüla aser departmental recruitment ajanga meshimtsüla ta parnokisa ashi.

Maneni, Principal Director mapa ya agientsüla kechiyong iba ajanga Department nung Director ya 'rubber stamp' ka ama dang kümdaksür ta RPP-isa School Education department Advisor dang mepishia metetdaksüog.

## DUCCF-i Dimapur nung fogging drive inyaker

**Dimapur, September 5, 2023 (TYO):** Dimapur nung Dengue tashidak kanga teimba akümba atema tebilemstü bena Dimapur Urban Council Chairmen Federation (DUCCF)-i ward ajak nung fogging drive inyaker.

MLA & Advisor H. Tovihoto Ayemi nungi teyari agia DUCCF-i Mongulbarne Lakeview Colony

nungi iba mapa tenzükog.

Iba sentong nung Naga Council Dimapur president Etsungmomo Kikon aser DUCCF president Zasivikho Zakiesato nati o tatsütsü jembi aser sarasadem ka agir mapa tenzü.

Iba fogging drive ya Dimapur urban area kübok colony 93 nung inyaksü.

"Tovihoto Ayemi nungi teyari agia DUCCF-i iba mapa inyakba atema tenüngsang agütsür. Dimapur nung dengue kanga puteter aser iba ya tebilemstü khuret tulu ka lir anungji nübertemi iba tashidak azüoktsü aser noktangtsü atema inyaksü ayongzüker" ta NCD president Etsungmomo Kikon-i ashi.

# AKM-i tesayurtem nem tetushi agutsüba sentong ayongzüka agi



AKM-i tesayurtem nem tetushi agutsüba sentong ayongzüka agiba nung Mokokchung District kübok District Teachers Award senpet agizükertem den Mokokchung Deputy Commissioner Thsuvisie Phoji, AKM lenirtem aser Sentong nung shilem agirtem külemi tangokba noksa.

**Mokokchung, Rongjui/September 05(TYO):** Ao Kaketshir Mungdang-i(AKM) ayongzüka Whispering Winds Conference Hall nung tanu 62 Buba Tesayurtem anogo Sentong den repsema Mokokchung District kübok District Teachers Award senpet agutsüba sentong kanga dang mera ket keta agiogo. Tanu iba sentong nung Mokokchung Deputy Commissioner Thsuvisie Phoji-i mapang tatsüka agia jembidang tesayur mapaji tanga mapa ajak rongnung tematiba aser tetushi tulutiba agutsütsü tetemsütiba lir, tanu nüburtemi tesayurtem nem tetushi tulu agutsür, kechiaser nenoki nentaka aser bendanga

aguja inyakba ajanga nübur jenti jenjang tajung nung noktaka lirta ashi. Mokokchung district teachers award agizürtem nem tenungsang agutsüba den paisa award agizükertem dang ano maneni alima asoshi tesangwa agutsütsü talila mera agishiangta Mokokchung DC-isa ayongzüka ashi. Mokokchung DC Thsuvisie Phoji-isa Ao Kaketshir Mungdang-i kum 62 tashi tesayurtem nem tenungsang aser tetushi aguja sentong tajung ayonga akabaya tesüngmangtsü mapa tajung ka Naga nunger shinga telokia meinyakba mapa tajungka inyakerta AKM tenungsanga ashi.

Kasa sentong District Education Officer Mkg. Wt.Sentinenla, All Nagaland Private School Association Mkg.Unit President Dr.Anungla Aier parnokkia shilem agia jembiba den AKM Tir Lanutoshi Aier-i Tarur pela agizüka jembiba aser AKM Shisaliok Zülur Lanulemba Longchar-i Anküp o jembiba den Town Higher Secondary School puri ken tajung ka tena lokti ajungmeso aser MTBA Asso.Pastor Shilula Imchen aser Sangtam Baptist Church Mokokchung Asso.Pastor Youth Yangthriela Mongzar tenatia sarasadema shilem agi aser kr.Imlimenla Longkumer lenisüba nung iba sentong agia liasü.

# Education Department penjar lir, temelenshi mera agitsü: Advisor Yhome

**Kohima, Rongjui/Sept. 05 (TYO):** School Education aser SCERT indang Advisor mapa agizüker district kar sema jajaba sülen Dr. Kekhrie Yhome-i Department of School Education kanga penjar lir aser temelenshi mera agitsü, ta Hombar nikongdang ashi. Hotel Japfu, Kohima nung Principal Director, School Education, Thavaseelan K lia osangbener den jembidang, office nung ita pongu dak tema inyakonga arudang metokmeperi aika ajitetogo aser itemji ajanga department ya jenjang tamajung nung aser kanga penjar lir, ta Advisor Yhome-i ashi.

Tang state nung government school 1939 lir aser tesayur 17,475 lir, aser item rongnung Post Graduate Teachers 595, Graduate Teacgers 4973, Primary Teachers 9520, Language Teachers 131, Graduate Teachers (Hindi) 158, Under Graduate Teachers 1801, Physical Education Teachers 184 aser Vocational Training Teachers 114 lir. Tangbo school aser tesayur tensa tia balaka nung lir, kechiaser department-i küm aika recruitment magi arur, talisa graduate teachers tem agi kanga anünger aser iba yongji math aser science tesayur mali ta kinük ajungalen nungi ola adoker, ta pai ashi.

reprangshimba mapang lir, ta metetdaksü. Tesayurtem kasa lemsatsü asoshi mera agitar aser kaketshir mali aser school tali ta aliba yimtsüngtem nung school tem lokteptsütsü, ta ashi. Proxy tesayur dak sendakba tebilemsü lemsatepba mapang, yimtsüng kar nungbo proxy tesayur ayuba nung putu menden densema lir, kechiaser Graduate Teacher kati itasen lak ka dak tali angur aser putu menden, regular teacher aser proxy teacher itasen ya sadanger, ta Advisor Yhome-i ashi.

Ita pongu tejakdang Directorate of School Education ajanga directorate nung mapa inyakertem, district balala nung government school tesayur aser Grade III mesüra IV employee kwi aliar mejangjai liasü, ta pai ashi. "Onoki kanga meranga survey agiogo aser tangbo itemji jangjaogo," ta ashi. Police department sülenbo state nung sorkar mapa inyaker timüba aliba departmentji DoSE ya lir aser sorkari education department nung staff aser tesayur nem itasen agütsüba nung sen crore 1730 indoker, ta ashi. Directorate of School Education nung staff 341 lir aser district balala nung kasa department nung mapa inyaker 3780 lir, ta Advisor Yhome-i metetdaksü.

Ano December 2024 tashinung government school nung tesayur 323 mapa nungi anisüngzük angutsü, anungji ano tesayur agi tali anünger-apongsü, ta ashi. Kasaji Government Primary School tesayurtem district alemer maotsü sorkar nungi tetuyuba agüja lir, kechiaser parnokki pei oshi nung jembishinütsüsa adoker, saka Primary Teachers aika pei district nungi ainshio, ta Advisor School Education & SCERT ajanga ashi. Temelenshi tulu bener arutsü asoshi department-i maparen balala inyakba mapang lir, aser department dak kongshiba ken o balala atema survey kanga junga agiogo aser cadre review, seniority list, proxy teachers, tesayur agi anüngba, school upgrade aser down grade asütsüba amala tang

Anungji proxy tesayur ayuba yimya samadaksütsü mechi department ajanga 'facial biometric system' benoker, ta ashi. Department-i tekeraba nung tesayurtem pei posting aliba tesemi aotsü totuyuba agütsütsü, aser aibelener nem temerenshi tulu agütsütsü, ta metetdaksü. Iba atema pai kaketshir tentet balala dang saksalema meita atar iba amala osang department nem agütsütsü ayongzüka liasü. Chang Students' Union ajanga par kübok aliba school 67 prong semdanga tesayurtem den sensaksema den külemi school ki mejungi aliba noksa bendenba atema pai tenungsang agüja liasü. Department anema ken o 178 benoka lir, aser maparen shidak inyak tenzüka sülen ano court nung ken o timba benoktsü akok, saka tsüboa mali, ta Advisor Yhome-i ashi.



Sept 4 nü Integration of CHILDLINE HELPLINE -1097 & WOMEN HELPLINE -181, Control Room with Emergency Response Support System-112 tenzüka sentong ka Nagaland State Social Welfare Board Office Mokokchung nung akaba mapang tangokba noksa nung angur. Iba sentong nung Secretary to the Govt. of Nagaland, Department of Social Welfare & Mission Director, Mission Vatsalya, Martha Ritse (IAS), tongti tesemdang liasü. Mokokchung, 4th September, 2023

# NTC tashikang tuluba akumtsü pangjem

**Dimapur, Rongjui/Sept. 05 (TYO):** Nagland Tribes Council (NTC) ajanga Dimapur nung August 30, 2023 anepdang 11:00 ako nungi tenzüka kin ti tribal hoho tem - Angami Public Organisation, Ao Senden, Chakhesang Public Organisation, Loha Hoho, Pochuri Hoho, Rengma Hoho, Sümi Hoho aser NZPO - shisadokden senden ka agia liasü. Mepaitoktetba sentong kar aliba mechi CPO aser NZPO iba senden nung metenteter ta osang yoka liasü, ta NTC tir Tonihö Yephthomi aser tongti zülur Nribemo Ngullie nati sangdong ka ajanga ashi.

dak sendakba ken o jembitsü nükjidong nung iba senden ya ayongzüka liasü. Züngsem temi anogo tepiyong pei atongba lemsatet aser Nagaland nung aliba Naga nunger arok sapang tajung ka nüngdaker ta ajiteta aser tang NTC Office Bearers kümsük October 2023 nung tembangtsü aliba mechi, tangatetba nung tashi itshtisü aser mapang shidak nung team tasen tentetshitsü nükjidong nung NTC ya ENPO jurisdiction kübok aliba kin tem den lungjemer inyaktsü pangzüng ka ajaki molungtepa agizüka ayu, ta sangdong ajangasa ashi.

# Angh-i Janmashtami benjong salem lemsatet

**Dimapur, Rongjui/Sept. 05 (TYO):** Janmashtami benjongmung salem ajak dangi abener, ta Nagaland Angh, La Ganesan-i Mongulbarnü sangdong ka nung ashi. Lord Krishna asoba nungtem nung Janmashtami benjong ya amunger. Iba benjong ya anema aliba, telungjem aser tamang indang

temaitsü lir aser tajunga süang tamajunga süang, kechi südir süaka langka ka atema ataloker. Ibai oli-aruli ta asür, aser asenoki agizütsüla, ta pai ashi. Iba temeshi anogomung nung nisung ajak temang anema, tepela aser yimchiyimjung nung alitsü moatsür. Tsüngremi Nagaland moajang, ta Nagaland Angh sangdong ajanga ashi.

# NHHDCL ajanga State Handloom Expo ayongzüksü

**Dimapur, Rongjui/Sept. 05 (TYO):** Nagaland Handloom & Handicrafts Development Corporation Ltd. (A Govt. of Nagaland Undertaking) Dimapur, Nagaland ajanga 2023-2024 tsüngta tsünglanglen agüja aliba mapang aser tesem nung State Handloom Expo ayongzüksü. 1. Urban Haat Dimapur, Nagaland: 09.10.2023 nungi 22.10.2023 tashi. Application October 5, 2023 tashinung agütsütsüla. 2. Phek Town, Nagaland: 05.12.2023 nungi 18.12.2023 tashi. Application December 2, 2023 tashinung agütsütsüla. 3. Urban Haat, Dimapur, Nagaland: 16.02.2024 nungi 29.02.2024 tashi. Application February 12, 2024 tashinung agütsütsüla. 4. Kohima Village Ground, Kohima: 05.03.2024 nungi 18.03.2024 tashi.

Application March 1, 2024 tashinung agütsütsüla. Item sentong ya Office of the Development Commissioner (Handloom), Ministry of Textiles, Govt. of India, New Delhi ajanga sponsor asütsü. Jangra aliba Co-operative societies, Producer companies, SHGs, Federations, Apex Societies, silk weavers densema Handloom & Handicrafts agencies, Jute Artisans aser KVIC temi shilem agitsü asoshi Project Cell, NHHDCL Ltd, Half Nagarjan, Dimapur nem address, mobile number, IFSC code dener Bank A/C No tejanga application zülur office mapang shia aliba anogo matongdang agütsütsü ayongzükter, ta Vitsutho Nyuthe, Managing Director, NHHDCL ajanga sangdong ka nung ashi. Stall ajak angati agütsütsü aser NHDP guidelines nung aliba ama Lumpsum TA/DA/and Freight charges agütsütsü.

# NPCC tir S. Supongmeren Jamir-i Mokokchung semdangtsü

**Mokokchung, 05 Sep (TYO):** Nagaland Pradesh Congress Committee (NPCC) tir, S. Supongmeren Jamir-i anir par külem party tenzükeritemi Mokokchung semdangtsüba lir, iba dak sentakba nung jembishinütsü kar alinung, Mokokchung District Congress Committee pur 11th Sept, 2023 nü anepdang 10:00 ako nungi, party office nung senden ka akatsü jateper. Anungji, Constituency 10 nungi ACCC tir & tongti zülurtem, district Mahila & District Youth Congress ketdangsurtem, Mokokchung district nungi PCC züngsemtem, DCC Advisor-tem, Seva Dal, DCC officials aser taoba minister/ MLA ajak iba senden nung adentsü asoshi Mokokchung DCC tir, Watimongba Aier aser

tongti Zülur P. Aley nati yokba sangdong ka ajanga mepishia metetdaksü. NPCC tir, S. Supongmeren Jamir-i NPCC tir mapa agizüker külen, mezüngbuba tour sentong Aug 29 nungi tenzüka district pezü; Phek, Kiphire, Noklak aser Tuensang semdanga party ketdangsurtem ajurua parnok den senden balala menogo. Tanabuba tour sentongji Sept 11 nungi Mokokchung nungi tenzüka tanga district balalai aotsü sentong renema lir, ta DCC sangdong nungsa metetdaksü. NPCC tir-i Mokokchung semdangba mapang Congress party ketdangsurtem aser ano Mokokchung nung aliba mulungtet telok balala dena mensem akatsü sentong lir, ta osang ajanga metetdaksü.

## METONGSHITSÜR

Mokokchung Treasury Officer ajanga pensioner-tem dang sangdongba osang ka 5th September, 2023 nü koba osang kakat balala nung adokogo, osang adoka aliba ama masü saka "13th October, 2023 nü Jangpetkong, Tsürangkong aser Japukong tükong" ta azüngtsü mepishir. Aibelenba asoshi sarsar.

Sd/-  
DPRO Mokokchung.

# Delhi nung electric bus 400 tenzüksüogo



Delhi Lt. Governor VK Saxena aser Chief Minister Arvind Kejriwal nati New Delhi kübok IP Depot nung sentong ka agiba mapang electric bus tasen 400 tenzüksüogo.

**New Delhi, Luroi/August 5 (Agencies):** Delhi Lt Governor VK Saxena aser Chief Minister Arvind Kejriwal nati Mongolbarnü electric bus 400 tenzüksüogo. Bus 400 tenzüksüba sülen linük yimtiba nung bus 800 jungogo.

Bus tem tenzüksüba sentong ya Delhi kübok IP Depot nung agia liasü.

"Delhi nung electric bus ajak senteper 800 jungogo. Iba dak sendakba nung ni Delhi nung alirtem nem tenügsang agütsür," ta Delhi Transport

Minister Kailash Gahlot-i bus tenzüksüba sentong nung ashi.

Iba sülen mapang tatsü ka lir Kejriwal-i X sabang ajanga bus tem atema budget indang metetdakja liasü.

"Lieutenant Governor den külemi tanü electric bus tasen 400 tenzüksüogo aser item bus ya Delhi nung alirtem atema bendanga agütsüogo.

"Item bus tem ya subsidy scheme kübok bus 921 alitsü aliba nung shilem lir aser iba atema Centre-i subsidy sen crore 417 agütsüogo aser

Delhi sorkari sen crore 3,674 intoktsü," ta Kejriwal-i ashi.

Delhi nung tang electric bus 800 inyaksangshidar, koba linük nung timtiba asütsü, ta paisa shisem.

"2025 küm tatem tashi nungbo electric bus 8000 inyaksangshidaksütsü asoshi onok nükjidadong lir. Iba mapang tashi nungbo Delhi nung bus 10,000 dak tema akümtsü aser shilem 80 bo electric asütsü.

"Delhi ya yakta electric bus service tajung agütsüba atema alima ajungai meteta akümtsü," ta pai ashi.

# Pawar-i 50% quota cap agina 15-16% agi ajungkettsütsü akhang

**Jalgaon, Rongjui/September 5 (Agencies):** NCP tir Sharad Pawar-i Mongolbarnü, lokti timba nem maongka agütsütsü atema Centre-i quota nung 50 per cent cap agüja aliba agina shilem 15-16 agi ajungkettsütsü asoshi takhangba agütsüogo. Maharashtra nung Maratha reservation dak sendakba nung asendenshir inyaksangshiba mapang pai iba takhangba agüja liasü.

Osangbenertem den sensaksemba mapang Nationalist Congress Party (NCP) tekolakba yagi ashiba agi, Congress tir Mallikarjun Kharge-i, Bodhbarnü INDIA alliance kübok lenirtem ajak senden ka amentsü asoshi ayongzükogo. Party 28-i kumtetba alliance ya taruba küm general election nung BJP-i aniba sorkar atsingtoktsü nükjidadong nung inyaksangshidar.

State nung Maratha kini sorkar mapa aser educational institution tem nung parnok atema menden mekazüksütsü khanga longkak aita arudar.

"Nisung kari ashiba agi, nüburtim timba OBC (other backward class) beneficiary tem kümdaksüba ya tang OBC quota kübok sensak tia nung aliba nüburtim atema tim masü. Iba ya sentoktsü makoktsü.

"Tanga lenmang kaji Centre-i Parliament nung tang 50 per cent cap tokja aliba dak sendakba nung amendment yanglua shilem 15-

16 bendenloksütsüla," ta Pawar-i ashi. Tang aliba OBC quota nung Maratha nungertem züngoksemsü atema lenir kari akhangba dak sendakba nung ken o ashishiba mapang pai iba telangzüba agüja liasü.

Paisa, OBC aser tanga loktitem tsüngda kecha tebandang malitsüla, ta ashi.

Maharashtra kübok tesem aika nung tsüngsarosa agi kongshir aliba dak sendakba nung Pawar-i, nashi chang atema chiyongtsü, tajemtsü tzü, t s ü n ü s e n p o n g t s ü t e m kümzükaayutsü atema jenjang agiba, aluyimertem nem senotsü teyari agütsüba aser state sarutem ajak sota ataba amala jenjang kar sorkari agitsü nüngdaker ta ashi.

Taoba ita Jalna district kübok Antarwali Sarathi yimtsüng nung police temi longkak aiteritem zük meinshiba aser parnok senshidaksütsü atema tear gas khaloktsüba sülen Maratha reservation ya asendenshir ken o teyongtsü ka kümogo. Police-i ashiba agi, longkak aiteritemi, Maratha quota atema nisung ka lumia longkak aita aliba mozükidangi anir aotsü asoshi ketdangsürtim nem temelaba magütsü laisü.

Iba lendong nung police 40 densema nisung aika yiru aser state transport bus 15 dak tema rongtokja liasü.

# "Onoki Alliance tenüng Bharat melenra parnoki linük dang BJP ajatsü asü?" Arvind Kejriwal

**New Delhi, Rongjui/September 5 (Agencies):** G20 summit nung adentsü aliba bendanger lenirtem jaokba shiti nung 'President of India' melena 'President of Bharat' amshiba atema telangzüba balala agütsüogo. Opposition lenirtem aikati iba jenjang agiba ya aitsüogo.

Opposition lenirtem rongnung AAP tekolakba Arvind Kejriwal-i India melena Bharat amshiba dak sendakba nung telangzüba agüja, opposition alliance-i parnok telok tenüng 'Bharat' ajatsü telemtetba agira ruling party-i linük tenüng BJP agi melentsü asü, ta asüngdang.

M o n g o l b a r n ü osangbenertem den sensaksemba mapang Delhi chief minister-i, "Nüngja melentsüba indang official osang kecha mali. Opposition party aikati alliance ka tenteta INDIA ajatsü telemtetba agiba ajanga Centre-i linük tenüng melentsü asü? linük ya nisung crore 140 meyong lir aser party ka meyong masü. Alliance tenüng Bharat-i melenra parnoki Bharat tenüng BJP agi melentsü asü?" ta asüngdang.

AAP nungisa Rajya Sabha MP Raghav Chadha-i BJP aitsüogo aser ashiba agi, linük ya political party ka meyong masü.

"BJP-i tawa official G20 summit invitations nung 'President of India' melena 'President of Bharat' amshiba

sülen nüburtim olangtep tenzükogo. BJP-i kodaser 'INDIA' tsükdaksütsü? Linük ya political party ka meyong masü; iba ya India nung crore 135 meyong lir. Asenok indang national maitsü ya BJP indang jurila meyong masü, koba parnok mulungka nung melenshiba masü," ta Chadha-i X sabang nung post asü.

West Bengal Chief Minister Mamata Banerjee-ia, alima ajungai linük ya India ta meteta lir aser Rabindranath Tagore tenünga melentsütsü asü masü ta bilemdanger, ta ashi.

"Parnoki India tenüng melener ta angashiogo. Tir tenüng nung jaokba nung Bharat ta zülua lir. Iba ya kecha tasen masü, asenoki English nung India ta amshir aser Hindi nung Bharat ta amshir. Onokia Bharat ta ashir. Ajisüaka alima ajungai linük ya India ta meteta lir. Tang ajubena linük tenüng melentsüba kechi atalok? kabi thakur (Rabindranath Tagore) indang tenünga melentsü asü," ta lai asüngdang.

Kasa mapang nung Tamil Nadu Chief Minister aser Dravida Munnetra Kazhagam tir MK Stalin-i ashiba agi, BJP-i India melenshitsütsü tenangzükba agütsüogo, ajisüaka küm teku sülen parnoki tenüng dang ka melentsü.

"BJP atsingtoktsü atema parnok anemba party tem longjema alliance nungja #INDIA ta agütsüba sülen BJP-i India tenüng Bharat-i melener.

BJP-i India melenshitsütsü tenangzükba agütsüogo, saka küm teku sülen parnoki tenüng dang ka melentsü! India nungja agi BJP pur anokshitsü ama repranteter, kechiyong parnoki opposition tem longjema tashi jangjaogo. Election mapang India-i BJP mintoktsü," ta DMK tekolakbai X sabang nung post sütsü.

RJD lenir Manoj Jha-i ashiba agi, "Onoki onok indang alliance tenüng INDIA jatsüba sülen BJP-i, 'Republic of India' melena 'Republic of Bharat' tenüng nung invitation yok tenzükogo. Constitution Article 1 nung 'India, that is Bharat' ta zülua lir. Nenoki India mesüra Bharat onok ket nungi magintetsü."

Iba jenjang agiba atema Congress-ia aitsüogo aser Narendra Modi-i aniba sorkari puti otsü pelepsatsüba aser

India lemdangtsüba atema aitsüogo.

X sabang nung Congress General Secretary aser taoba Union Minister Jairam Ramesh-i ashiba agi, "Rashtrapati Bhawan-i, September 29 nü G20 dinner ka atema 'President of India' melena 'President of Bharat' tenüng nung invitation yokogo. Constitution Article 1 nung 'Bharat, that was India, shall be a Union of States' ta zülua lir, ajisüaka tangbo "Union of States" dena amokmerener."

Congress MP Shashi Tharoor-ia, India tenüng sentoktsüsa sorkari tamachi mapa minyaksü imlaba lemsatapa liasü.

Ajisüaka BJP lenir aser minister temi Bharat tenüng amshiba pelashishia agizükogo aser linük aser constitution anema inyakba atema Congress aitsüogo.

Assam Chief Minister

Himanta Biswa Sarma-i, invitation nung tenüng melemba ajanga pa kanga nema dangdaksüogo, ta ashi.

Congress lenirtem taitsüba dak sendakba nung BJP tir JP Nadda-i ashiba agi, opposition party temi linük aser Constitution akümtsüba masür.

"Linük meraket tushitsü atema jenjang agiba ken o tem ajak kechiba Congress-i anemer? Party kati kechiba Bharat Jodo tenüng nung political yatra ka ayongzükba agir saka Bharat Mata Ki Jai sangdongbabo sempar? Congress-i linük, Constitution, mesüra constitutional institution akümtsüba masüba jangjaogo. Parnoki kibong ka tenüng asangtsü atema dang bilemer. Linük ajungai Congress-i linük aser constitution anema nokdakba jangja lir," ta BJP tekolakbai ashi.



Kolkata nung Mother Teresa sür küm 26 ajungba anogo Missionaries of Charity nungi nun tem sarasadem agütsütsü atema atatepba noksa nung angur.



## TIR YIMYIM YIMOBILEM (EDITORIAL)

DIMAPUR RASEMNÜ, RONGJUI (SEPTEMBER) 06, 2023

### Kodanga sodi magiba tesayur !

**Y**ashi ama küm shia tesayurtem anogo amungdang nisung shiai pei tesayurtem bilemteter aser menungrar, kechiyong, nisung ka kaketreju nung azüng piyong nung sayuba tesayurtemji pa mesüra la asoshi akümüli piyong tesayur akümer. Aji oda, tesayur mapa inyakerem shia asoshia pa mesüra la sayur tesayurtem aika lir, iba jagiang tesayurtem anogo among dang, tang teinyakdak tesayurtem dang nungibo ano taoba tesayurtemang tebilemteter aser temenungraba bilema amonger. Item taoba tesayurtem aika nungi tang teinyakdak tesayurtema aika tatishitsü tajung agir aser parnok taküm mapa bilemtet dang, pei mapa nung ano kümümshir temulung tagütsüba agüja inyaksü ajungshir. Atangji, tesayurtem aikati kaketreju nung tanurtem dang sayuba mapaji Tsüngrem tenzüka aser kin ka yangluba mapa tongtibang rongnung ka lir ta angateta kanga temulung agüja sayur. Item tesayurtem asoshi kaketreju kiji tekülem ki amai lir. Parnok jagibo pei melen proxy tesayur yoktsü-bo yimdangia marur saka anepdang shia school ki atongtsü yongyar. Item tesayurtem jagi kodanga sodi magir aser khen khen temang teraka majung agibo school-i aoer aser school kidang külem tesayur aser tanurtem ajurudang shirang anepadoker. Item tesayurtem alidak kaketrejuji tenla kidanga taoba, yangji shitakba shisatsü apoker, tanurtem tangatetba angur aser nüchi akümer. Atangji, onok azüngba kaketrejutema yamala kaketrejutem liasü. Item kaketrejutem nung tesayurtemi sayubatem tanüa nükilai arua asangsang nung class takdang nung mener parnoki sayuba angur amai yimdangi arua bilemer. Item tesayurtem rongnung kübua ka liasü. Iba tenüng tajungji tanü ni akaba rongsen tulutiba lir. Ni meteta pai kodanga sodi magi. Ni meteta pai kodanga menur school-i mao. Paji tesayur dang masü saka chowkidar amai liasü, kechiyong anepdang shia parnok school-ji pai lapok aser pai-ang tsüngtsüng atem. Tanü kübo alima nung mali saka par school tsüngtsüngbo tanüa par kidang nungi atemer. Atangji, paji tuluka aser talangka azüngba nisung masü saka pa dak school tanurtem sayutsü jangraba tanela aser tangatetbajibo kanga tulu liasü. Pa tesayur mapa inyaksü tenzüka dang pai anir parnok school ki kimung tama atu aser school ki yanglu, kechiyong yangji alir nübertemi kimung tur ki yanglutsü memeteti liasü. Tanurtem ku memejep, tejak memeyi aser süoshi junga magi school-i aru, kechiyong parnoki temeteta memetet aser taka-a maka liasü. Item libaliro sayutsü bajia parnok school nung nungdak adok. School tenzüka lesson magidang, anepdang shia tanurtem külem sarasadem mapang agitsüba mapajia pa mapa amato liasü. Atangji, pa Bible school nunga mazüng aser taküm nung ajitet-ajiteta tashimait aika liaka, kübuji Tsüngrem o jembitsü nung tajung aser kententsüa terok tajung liasü. Lokti ken atandang pa kijaia bass-bo jeta oa liasü. Aji oda, anepdang shia tanurtem ajak takdang tuluba nung sentepdaksür tashitemang agi tanurtemi ayima-ayima atenba ken agi kiyong ajak lemsadaksü aser temeket arem ajak metangdoka oa atenba kentem tanüa temulung nungbo tena angashir. Tsüngrem taochi agi pa kotak nung alinungbo aser kotak nunga tanurtem atema school lapoka alinungbo, pabo kotak nunga primary school tesayur inyaka alitsü amai bilemer. Aluyimeri alu toktsür kenüdanga kidang memongnü ama, tesayur kati pei school nung tanurtem dang sayutsü jangraba agi, kenü danga sodi magii, mapa nung ali tepiyong inyakba tejangraba aser tangatetbaji tesüngmangtsü, tenükshitsüka aser tapayutsüka lir. Ibajibo ita sen asoshi tesayur mapa inyaker masü saka tanurtem tajung kümdaksünüba tangatetba ,temulungtetba aser tejangraba agi inyaker. Iba ama tesayurji koda jangratemtsü aser koda tepelatsü taküm asütsü ! Ibayongji, tesayurtembo mapa nungi anenaka nisung aika mulungjang nung akhüm agüja bilemteter aser süaka nisung aika mulungjang nung taküm alir. Atangji, kodanga sodi magidangba tesayur bilemtetsüba anogoa tesayurtem anogo yasa tajungba !

## OLEMSABANG

AO BAPTIST AROGO MUNGDANG (ABAM) AJANGA  
SARASADEMSTÜ AYONGER  
(SEPTEMBER 7, 2023, 7:00 - 8:00 PM)

- *Mar Pongener, Executive Secretary,  
ABAM, Impur*

Oh Kibuba, onok dak kechi ataloka lir, aji bilemtetangma; ajiang, aser onok maksü reprangang (Aiatai 5:1).

ABAM ajanga adianutem ajak den Yisu tenüng nung temeim salem lemsateper. Teküboklen agüja aliba tebilemstütem asoshi Aor Tsüngrem chirtem ajak pei aliba tesem balala nung aser kibong shia nung September 7, 2023, aonung 7:00-8:00 PM sarasademtsü ayonger. Külemi lungjemer sarasademba nung tashi lir. Iba temoatsü Tsüngrem nungi agizüksü asoshi ajaki tamang akangshir mulungsoa shilem agitsü mepishir. Asen sarasadem ola Tsüngremi angashitsü aser langzüksü.

### Kechiba iba Sarasadem Ayonger?

Ya aroka shisadangdi! Tsüngremi Ao kin dang kanga meimogo. Tsüngrem tenyartemi Yisu Osangtajung bener alima kinük ajakleni prokshia ao. Naga kintem rongnungi Tsüngremi Ao kin dak ranglok aser mezümpur kümdakja Aori Osangtajung agizük. Ya Tsüngremer temoatsü tulu ta agizüka amanga aruba tanü joko küm 151 buba nung jajar. Saka tanü Khrista Yimsü aruba dak sendakba tsütsü mepetmesü aliba ajanga tamanger shia mulungjang nung khuret bener tepela tanela samaa odaktsütsüsa küma aoba mapang ka nung asenok lir. Anungji iba mepetmesü ya süngjema kümdakjang ta Tsüngrem dang taochi meshia sarasademtsü asoshi ayonger.

### Item asoshi Tsüngrem taochi meshia sarasademdi;

- \* Khrista Yimsü arur küm 150 tepela benjong tulu ayonga mongogo. Saka Khrista Yimsü aruba tsütsü mepetmesü aliba ajanga tanü asen mulungjang nungi tepela samaa aser tepela tsüngsangba mangyimba küma odaktsür (Aiatai 5:15). Tsüngrem taochi ajanga asenok Khrista nung nüji kümdaksü aser iba Osangtajung aruba indang tesadok aser tepela tanela tener jembitetsüsa Tsüngrem nungi taochi meshidi.
- \* Alima asünung timtem, tekangshi, shisabulu aser khuretji asen sobutsü. Tanü Aor tamangertem tiptem tanela makadaksüi timtemdaksüba küli aika lir. Item rongnung Khrista Yimsü aruba dak sendakba tebilemstü aser mepetmesü ajanga asenok anisüngzük makai timtemdaksür. Kati ka aitsütepba, kati ka dak mulung malemba aser tepela melen tejashitep ajak ajangzükdaksüba ya mojingentong. Mojing den raratsü asoshi Tsüngremi agütsüba raraba sobutsü sobur tasü ita temeim nung ka küma alenteper nokdaksü Tsüngremi asen den jembir. Aseni amangba Tsüngrem ya tashi tulu aser ain ajak pa dak lir aser pai pa chirtem nem tangatetba agütsür (T Ken 147:5). Iba mepetmesü süngjema akümtsü asoshi tamanger shiai temeim aser taochi agi sünga aliba asen Tsüngrem nungi shisatsü aser tangatetba meshia sarasademdi.
- \* Aseni bilemba, taginüba, teyongyaba ajak Tsüngremi meteta lir (1 Yohan 3:20), aser aseni pa nükdang kechi tajung lir aji inyaka aser pa ozüng beshira aseni meshiba ajak pai agütsütsü (1Yohan 3:22). Tanü Khrista Yimsü aruba dak sendakba nung tebilemstü alibatem sünepa akümtsü asoshi Tsüngrem tashi sendoka yutsür alima tashi aser alima Obendangdak dangi meyipra asen Tsüngremi asen dang mepelatsü. Kor talungtsü dak temulung alemba nungji temoatsü mali saka tamang agi Tsüngrem dak temulung alemba nung temoatsü lir. Kor aser ibala mesükba alima tashi dak temulung alemertemji metsüdaksü aser alangtsü (T Ken 20:7,8). Item rongnung asenok tamangertem matentsü kümdangdi. Alima tashi dak masü saka Tsüngrem dak imlatsü tashi bushidi. Tebilemstütem ajak Tsüngremi süneptsütsü koka ali nung pa tashi aser tatenba bushia sarasademdi.
- \* Tsüngremi Ao kin kanga moatsüogo saka asen tashi mait aser aibelenba metoktsütetba ajanga tanü hon ama sentsüpranga aliba sentsü jena akümer (Aiatai 4:1). "Onok kolak nungi korang tsükogo, onok asoshi aiatai, kechiyong onoki tai menaogo (Aiatai 5:16). Asen aibelenbatem asoshi tatok meshia Tsüngrem dangi meyiptsüla. Kati ka majungba indang jembiba, kati ka aitsütepba, telungjem melena telemsa, temeim melena tetsükchitep adokdakja litepba ajak ya mojingentong mapatem lir. Arung, Tsüngrem tsüngdang ajemalua alitsü asoshi tangatetba shisatsü meshia sarasademdi.

Temeim adianutem, asen dangi koda masüba mapang arudang, shisabulu khuret agi anisüngzük maka timtemdaksüdang, tepela tesünep makateti alidang, terongjentia ajurudang, tasüba aser lendong balala ajurua aodang, mapang ajak nung Tsüngrem tsüngdang ajemalua mokremer sarasademtsüla. Asen tesüneptsürji aseni amangba taküm aliba Tsüngrem lir. Külemi lungjemer sarasadem temepishiba ola asen Tsüngremi angashitsü aser pai asenok ajak süngmangtsüsa mapa inyaksü. Takoksang Tsüngrem tenüng tali uludaksüdi. Yisui ashi, "... Ano ni nenok dang ashir, alima nung nenoki mepishiba langka atema nenok nisung ana temulung ka dang süra, aji kotak nung aliba kü Bui nenok asoshi inyaksü. Kechiaser kong ana mesüra asem kü nung nung lungjema lir, yangji ni parnok rongnung lir." (Mathi 18:20).

**Iba Olemsabang nung lemsaba ken-o aser shisatsü ya iba ocet züluri  
bilemba ken-o ama tazünger angateta agitsü mepishir**

## Pastor Mike Baker-i arogo tasen ka tenzükba sangdong



Bloomington, Illinois nung Eastview Christian Church indang taoba senior pastor Mike Baker-i arogo tasen ka tenzükba osang sangdongogo.

### Bloomington, Rongjui/ Sept. 05 (Agencies):

Kinungtsü yutsür arogo nung inyaker ka den meimtepba ajanga Central Christian Church nungi pastor Caleb Baker anentsüba sülen Bloomington, Illinois nung Eastview Christian Church indang senior pastor menden nungi alur ita trok lir Caleb Baker tebo Pastor Mike Baker-i arogo tasen ka tenzükogo aser tan ita nungi tekülem sentongtem agütsü.

Baker-i iba osang ya pa indang YouTube channel nung August 20 nü sangdong aser iba arogo tasenba tenüng ya pa indang online ministry tenüng Song & Sword Church jatsü aser September 10 nungi tenzükba Bloomington nung aliba The Chateau Hotel and Conference Center nung sentepsü.

"Chateau Hotel and Conference Center nung September 10 anepdang 9:00 ako nungi tenzükba tekülem sentong nung nenoka adentsü ajungshir. Chateau Hotel ya asenok amshitsü, kong asenoki contract ka zülutepogo. Aser asenok yangji taruba küm tashi ajuruteptsü aser ibai tesem tajung lir," ta pai ashi.

Baker-i ashiba agi tesüiba ita trok ya pa aser par kibong asoshi "Category 5 soul hurricane" yipru ama liasü aser iba mapang tanüla onshishia tzüsem ama temolung shiranga liasü.

Iba mapang parnoki Tsüngremjisa kibur ta angatet aser ministry tasen atema tanüla nung lenmang sayu, ta pai ashi.

"Tsüngremi asenok moatsü, aser ni Tanüla Temeshi nung amanger. Tsüngremi asenok dang Tenungsang Ken 149 sayu aser asenoki Song and

Sword ministry atema Pa mangdang nung ranglokdang tanü asenoki yangji shia alima ama inyaksü," ta Baker-i ashi.

Pastor Caleb Baker-i arogo nung pa indang jenjang amshia tetsürtem pa den shi nung medemtsüsa inyaktet, ta June ita Eastview Christian Church asoshi independent investigator temi bushiteta liasü.

Mike Baker-i kibong mechi mapa nunga shidak meinyaktettsüsa akum aser iba mechi pai atsüngzuka oa dangar nem len anidakja Caleb asoshi Laishiba nung shia aliba ama shidak inyakdaksüla asü, ta report ajanga ashi.

Caleb Baker-i tim masüba mapa inyakba, miimbangtsü merangba aser staff aser arogopur dak dak tashi amshiba indang bushisüngdangtsü asoshi arogoi taa agüja shimer ita asem shi lir iba bushisüngdangba osang ya yimjak nung law firm Wagenmaker & Oberly ajanga kaket tapak 11 nung sangdonga liasü.

Kinungtsü yutsür arogo nung inyuaker ka den shi medemba ngua Caleb Baker ya mapa nungi anentsür ta Arizona nung aliba Central Christian Church ajanga sangdongba sülen February ita Caleb Baker-i tim masüba mapa inyaka shi nung medemba tebo Baker-i miimbang ta tai tongloksüba temai adoka liasü.

Eastview Christian Church nung taintemi sangdong ka nung ashiba agi, Caleb Baker anema item tai tongloksüba indang ya pai 2016 küm arogo yutsüba sülen ang meteta akum.

Taoba mapang iba arogo nung inyaka alir kati 2016 küm mapa inyakdak tim masüba mapa inyakba indang July 2022 nung

ashishitepba sülen ang temai adoka liasü.

Arogo telung nung bushisüngdangba nung shilem ka ama Eastview Christian Church ajanga Mike Baker dang a s ü n g d a n g y a t s ü merangdang pai mapa ang yutsü aser par jabaso miim mapa miimbangba nung pa maden ta shia liasü.

"Mike Baker-i miimbangtsü meranger ta nüburtemi jembiba ni memeteti liasü. Christmas mapang yangi tatembang mali ta onoki pangjem. Item tai tongloksüba kuli tejangja mesüra mejangja mongutet aser ni ibai tembangogo ta bilema liasü," ta Mike Baker-i olulu tenzükdang par jabaso bushisüngdangtsü merangba indang shia liasü.

Tang tesüsa pai arogo tasen ka indang sangdongba mapang, Baker-i mang ayangtsü mesüra Eastview Christian Church den tokteptsü meranger masü ta ashi.

"Song and Sword Church, tetenzük nungi ni ya ashir, ibai Eastview Christian Church den tokteper masü. Molungsentsü temürek nung Tanüla Temeshi ni asoshi kuli lir, ni mang ayangtsü meranger masü, ni Eastview mesempar, parnoki tamakok ajurutsü ama ni mebilemstür. Ni Eastview Christian Church meimer," ta Baker-i ashi.

"Kü takum tesadang ka iba tesem nem agütsü. Yangji aliba nüburttem ni meimer. Yangji kü takum nung atalokba ajak ni meimer, aser Tsüngremi parnok tashi tuluba nung amshitsü ni sarasadem," ta pai ashi.

Nisung kar dak dang metaloker alitsü mechi Song & Sword Church nung adentsü sentong lira madentsüla, kechiaser arogo tasenba ya Yisu indang lir, ta pai ashi.

## ANOGO ABEN TSÜNGREM DEN

### Ne Tsüngrem ajurutsü renemang

Aser Kibubai Mosa dang ashi, Nisungtem dangi oang, tanü aser asüng parnok meshitetta yuang, aser parnok süoshi shidokjang, aser tasemnübuba asoshi renema liang: kechiaser tasemnübuba nung nisung ajak tsüngdang Senai tenem manung Kibuba alutsü. Anitet 19:10-11

Tsüngrem den ajuruteptsü terenemba nungdaker. Tsüngremji tesüngmangtsü aser tabensa temeshi lir. Merenemi Tsüngrem tsüngdang nokdakbaji tesempatsü mapa lir. Israel chirtemi Tsüngrem den ajuruteptsü asoshi parnoki anogo ana renemtsüla ta Tsüngremi parnok nem ozüng agütsü. Kodang nisungtem renema liasü Tsüngremi tsüngmok aser tsüngpret, mi aser mokozü aser jemji ola dena nüburttem den jembi (Anitet 19:16-25). Iba tajurutepba nüburttem Pa jenjang nung alitsü asoshi Pai parnok nem ozüng ter agütsü.

Iba yagi ne kolok, temulungtetba aser ne mulungjang nung mapa meinyakdaksüi anogo shiaji süidaktsütsü makok. Ibai Tsüngrem leman nungi pilatsü mapang talang ka magir. Alimai ne tanelaren samatsütsü mapa inyaker. Nüburttem alima nung anogo terok lir tenetnübuba nung Tsüngrem dang aser parnok asoshi Pai mulungba nung anogo tepiyong ranglokdaksütsü asoshi Tsüngremi Sabbath tentet.

Nai ne mapang tekülem asoshi renema alir asü? Taküm mapang matongdang ne mulungjang kechi agi süngdaksür? Aonung ne mulung nung bilemba aiben anepdang ibajisa bilema alir. Temerük tekülem asoshi tanelaren terenemba tenüngdaksü. Nai tekülem nung ajangshiba jagi ne tanela renemba nung yaritsü. Tsüngrem den ajuruteptsü asoshi ne sasa renemang.

## Pastor kati temenen tanüla aridokdang tetsür ka mi agi arong

### Rongjui/September 05

(Agencies): Pastor kati Nigeria tsür ka dak nungi temenen tanüla indoktsüba mapang mi kaoloka temang kanga sashia rongsa.

Arishi küm 21 tain Sukura Owodunni temenen tanüla nungi salatsüba maparen ya Nigeria southwest tsütsü Ogun State nung August 17, 2023 nü atalok ta ashir.

Pastor-i sarasadem balaka agütsütsü asoshi jaokba ama Owodunni-i pastor ya Cherubim and Seraphim Maberu Parish nung ajuru ta ashir.

Temenen talenba nungi salatsüba mapa inyaksang sayutsüngiri tetsürla dang perfume, entzü aser temu milen (candle) ka bener arutsü ashi. Pastor yagi perfume ya tetsürla dak inoktsü aser temu milen tsüklokdang la temang kanga sashia rongsa.

Iba tatalokba mechi pastor ya apu, kechiaser tetsürla ya mozüki nung anepalutsüsa akum. Iba dak sendakba nung bushisüngdang tenzükogo, ta public relations officer SP Omolola Odutola-i ashi.

Odutola-i ashiba agi, Owodunni ya mozü kidang temang anepalua amungtsüsa temang arongba sülen la temang anepaluba sen magütsüi yutsü.

"Onoki temolung melemi alisang puogo. Iba ken o bushisüngdangba sülen State Criminal Investigation Department nem agütsütsü," ta lai ashi.

Iba tatalokba indang tejangja tang ang temai adoker, aser ibai deliverance ministry ka süaka temenen aridokba maparen nung iba amala oset mesüra yimya mamshir. Shilem agir aikati Laishiba nung temenen agi kongshir alirtem tanüla nung Yisu-i taneptsü agütsüba nung maneni amanger.

Tesem kar nung deliverance ministry ya kanga ainer, ajisüaka temenen agi alenba aser temenen tanüla aliba indang ya secular aser Khristanpuri küm aika jembia arur.

New York City nung aliba VI Church nung pastor, Mike Signorelli-i temenen talenba nungi taneptsü agütsütsü merangba indang jembia liasü.

"'Deliverance' ta asüba ojang ya Laishiba nung mali. Laishiba nung deliverance ministry indang mangutsü. Yisu-i temene aridokba angutsü, Pa nütsüng temi temenen aridokba angutsü, Pai nisung 70 dang iba mapa inyaksü melaba angutsü," ta Signorelli-i küm tetenzüklen shia liasü.

**AO OSHI ANGAZÜKDAK:**  
**TANÜ ANGAZÜKTSÜBA OJANG**



**Sadong**

(n) medemer, mapa ajak nung yariteptsü pur ( trusted friend)

\* Asen taküm nung **sadong** ka alibaji adianu danga taoba lir.

**Saisabong**

(n) asaya tapu balala (games & sports)

\* Naga nunger **saisabong** nung kanga junger.

**OLONG PAITEP # 6627**

1					2			3
							4	
5		6			7			
8								9
							10	
			11		12			
		13						
14					15			
			16					

**TIPLIN**

- 1. O jembitsü tashi - 8
- 5. Süngjang tapu ka - 5
- 7. Tekanük nung enokba - 5
- 8. Teka amtep - 5
- 12. Tzüik asendak - 5
- 14. Tsünpang tema aliba - 5
- 15. Ken atenba yimya - 5
- 16. Asangur - 8

**LANGTSÜNGLEN**

- 1. Tepok telung nung shilem ka - 7
- 2. Tamajung aküm - 5
- 3. Chi den külemi achiba - 3
- 4. Meimchir alimai aruba - 3
- 6. Laishiba nung ayong ka - 4
- 9. Tarutsü nükla - 7
- 10. Tamendakdak/Nükjiong - 4
- 11. Tenük-telen mejungi aküm - 5
- 13. Terok nungi adokba - 3
- 14. Meimchir telemsa - 3

**OLONG PAITEP # 6626 TELANGZÜBA**


**TIPLIN :**

- 1. Taa, 3. Teküm, 6. Aibelen, 7. Aut,
- 9. Ajizük, 10. Ojala, 11. Semer, 13. Sen,
- 15. Kiochtsü, 17. Itsük, 18. Kar.

**LANGTSÜNGLEN :**

- 1. Tai, 2. Asensor, 3. Tanü, 4. Kua,
- 5. Mitsüchtsü, 6. Azübenshi, 8. Lah,
- 9. Jangkok, 12. Akok, 14. Nashi, 16. Sür.

**Agüja aliba noksa nung meputepi**  
**aliba 10 bushiang**



Tanur asoba anogo nung salem osang den noksa angati adokdaksünüra - Tenüing, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

**Tepela Tasoba Anogo**



- 1. Tenüing : .....
- 2. Tasoba anogo: .....
- 3. Küm : ..... 4. Class : .....
- 5. School : .....
- 6. Talidak : .....
- 7. Salem osang : .....

**Kohima nung Chimney Hut tesem melenshiogo**



**Chimney Hut kibur Veeky Sorhie Liu den külem inyakertem noksa nung angur.**

**Kohima, September 5, 2023 (TYO):** Kohima nung Chimney Hut ta ser Chinese chiyungtsü anguba restaurant tesem melenshir Secretariat Road, Kohima nung lapokogo.

Chimney Hut nung Chimney Soup, Sui Mai, Bao Zi amala chiyungtsütem angur

aser 2019 küm Keziekie Taxi Stand nung mezüing lapok.

Ajisüaka customer teimba aküma aser tawa talila nüngdakba agi Chinese restaurant ya Secretariat road-i belenogo, ta kibur Veeky Sorhie Liu-i ashi.

Deobar dak alaka

anogoshia anepdang 11:00 ako nungi aonung 9:00 ako tashi restaurant lapoktsü ta paisa ashi.

Chimney Hut nung birthday aser anniversary parties amongtsü akok aser catering services agütsür ta Liu-isa ashi.

**CPIM-i Tripura by-elections tasen agishitsü akhanger**

**Agartala, September 5, 2023 (Agencies):** Tripura by-election nung tim masüba mapa aika inyakogo anungji 20-Boxanagar aser 23-Dhanpur constituency anaprong nung polling tasen agitsüla ta CPIM-i takhangba agütsüogo.

"20-Boxanagar aser 23-Dhanpur Assembly Constituency by-elections nung BJP züngsemtemi police aser Civil Administration kar anisemer tensa mejungi kümdaktsür polling süogo" ta CPIM state committee secretary Jitendra Chaudhury-i Chief Electoral Officer (CEO) Puneet Agarwal dangi shidi ka zülü.

"Constituency aser temeket nungi bendangertem meindoktsü melena September 3 aonung nungi BJP züngsemtem constituency telungi aitdaksü. Parnok ya constituency anaprong nung tongtipang tesemtem nung mapa lemsüchtsü" ta paisa ashi.

September 4 aonung Chaudhury-isa ashi. Boxanagar nung BJP candidate Tofazzal Hussain-i CPI(M) züngsem Abu Jafar dak züka merenshi ta Jitendra Chaudhury-isa metetdaksü.

20-Boxanagar AC nung CPI(M) polling agents 16 aser 23-Dhanpur AC nung 23 dang pei pei polling booths telungi itet. Tanüingba polling booths nungbo BJP züngsemtemi meindok, ta paisa ashi.

BJP-i tangalen nungi anir aruba nisungtemi opposition pusemertem dang polling booths-i maotsü amokmeren. Iba jagi voters aika polling booths-i mao kidangi meyipa ao.

23-Dhanpur AC kübok Mohanbhog tesem nung Minister Bikash Debbarma-i anir BJP züngsemtemi nisungtem amokmeren. Iba mapang parnoki TYF lennir Jayanta Debbarma dak azük aser pa GB Pant Hospital, Agartala nung anepalu, ta

Külen, MLA Ramapada Jamatia-ia nisung aika anir senzü aser bendangertemi absentee voters indang vote enoktsü ta paisa ashi.

Polling booths aika nung BJP züngsemtem voting compartment nung lia vote enokdaksü aser kar nungbo BJP züngsemtemi dang vote enoktsü.

Item tatalokba nung ajemdaker CPI(M) Tripura State Secretariat-i constituency anaprong nung polling asüba agientsü aser security takang yur polling tasen agishitsü akhanger ta Jitendra Chaudhury-i CEO Puneet Agarwal dangi züluba shidi nung shia lir.

Paisa Minister Bikash Debbarma aputsü, Superintendent of Police Sepahijala agientsü aser Boxanagar o Dhanpur nung ROS mapa nungi anentsütsü takhangba agütsüogo.

**Manipur nung drone amshia yutsüba IED ka angu**

**Imphal, September 5, 2023 (Agencies):** Manipur kübok Moirang nung drone amshia yutsüba improvised explosive device (IED) ka sepaitemi raksaa endokogo.

Mongulbarnep South Manipur nung Manipur police aser security forces-i IED angu.

IED anguba sülen anti-bomb squad ka jaoka IED raksaa endok aser iba mapang lenmang nung traffic shibanga liasü.

September 5 anepdang 7:00 ako meta Moirang nung Manipur police aser Mahindra Showroom o Hotel Elegant

anasa and security personnel-i IED angu.

IED manguba jakdang sepaitemi Churachandpur, Thoubal, Imphal East, Imphal West, aser Kakching district tem nung tesem kar mita aodang prangpong ka aser tapoktsü pezü nguteta liasü.

**Tesayur kari lungkak aittsü yimya sübaogo: Assam Education minister**

**Guwahati, September 5, 2023 (Agencies):** State education minister Ranoj Pegu-i Assam nung New Pension Scheme (NPS) anema noktaka tesayurtem aitsüogo.

"Nisung kar atemabo lungkak aitba ya yimya sübaba ama

kümogo aser item nisungtm jagi lungkak aitba manentsü" ta Ranoj Pegu-i ashi.

Paisa lungkak aitba tesayurtem dang politics nung masü saka education nung temulung tali agütsütsü ayongzük. Teachers' Day nung All

Assam Government NPS Employees' Association (AAGNPSEA)-i pei pei school nung 'Karma Birati' (cessation of work) ayonga among.

AAGNPSEA-i National Pension System (NPS) anema iba sentong ayongzüka agi.

# Osettsüset nung jenjang atuba anema Nigeria nung union temi longkak ait

**Abuja, Rongjui/September 5 (Agencies):** Nigeria Labour Congress-i ayongzüka anogo ana atema "warning strike" tenzüko. Iba longkak aitba sentong ya ita ka tsüingda nung tanabuba lir, koba sorkari petrol subsidy agintsüba ajanga oset nung jenjang tali akümba anema ayongzüka lir.

Iba union ya linük ajunga nung sorkar tenzükerkem indang lokti tentet tulutiba lir. Brehostibarnü parnok, libliro jenjang tajungba küma yanglutsüsü atema parnok takhangba mataloktsüra parnok Africa nung economy tulutiba (Nigeria) ya shibangtsüsü ta amokmerenogo.

Taoba hopta senden amenba mapang parnok ashiba agi, Nigeria tir Bola Tinubu-i May ita petrol nung subsidy agintsü atema telemteba agiba ajanga Nigeria nung mapa inyakertem aser nübürtem kanga timtemtepar.

Hombor nikongtsüsü iba longkak aitba ya nokdangtsü asoshi merangdanga liasü, ajisüaka Ministry of Labour-i senden ka ayongzüka labour union lenirtemi magizüki liasü.

Health aser electricity densema sector ajak nungi mapa inyakertem iba longkak aiba nung shilem agidar aser iba ajanga office aika inyakyim nung tetsükdaktsü adoktsü imlar,

aser iba ajanga sorkar revenue atsingzüka oya aliba nung maneni tetsükdaktsü adoktsü.

Labour association tir Joe Ajaero-i ashiba agi, itasen ajungkettsüsüba densema mapa inyakertem akhangba sorkari mataloktsüra hopta ana tsüingda linük ajunga mapang telatet ka makai mokdanga ayutsü.

Iba union yagi August 2 nüa longkak aiba sentong ka ayongzüka, ajisüaka Tinubu den senden ka amenba sülen iba longkak aiba sentong ya thia liasü.

May ita mapa agizükba mapang tir-i, linük rongsenketzüng yanglushitsü tenangzüka agüja liasü aser iba ajanga investor tem aser lispourtem nem timla agütsü.

Taoba tir Muhammadu Buhari-i küm ti tashi yimsü asüba mapang policy shitak benoka inyaksangshi masüba ajanga rongsenketzüng anaben tashi atsingzüka oa liasü.

Tir mapa agizükba sülen mezüngbuba anogo subsidy aginba sülen Nigeria nung petrol jenjang asemen agi timba kumogo aser iba ajanga union tem mepelar aser gari senzusenpong jenjang kanga tasak kumogo.

Petrol nung jenjang ajungketba ajanga shishilemba tilalatem aser kibong million aika dak kongshio, shirnok power supply majungba

ajanga petrol generator tem dak metaloker alir.

Maneni sorkari currency devalue sütsüba ajanga tenügdakba osettem nunga jenjang tali kumogo.

Tinubu-i pa indang policy takok ngua tejakdangi bener aotsü atema mapa shitak nung jenjang magiba atema critic temi pai aitsüogo.

Tinubu-i aniba administration-i nübürtem timtem tekangshi agintsüsü atema jenjang aika agiogo, kong state tem nem loan aser grant densema USD million 5.5 agütsüba densema lir. Ajisüaka mapa inyakertem ashiba agi, itasen memelenshiba ajanga item jenjangtem agiaka kecha temelenshi balaka matoker.

Ajaero-i ashiba agi, mapa inyakertem aikati parnok mapai aotsü atema senzusenpong taa magütsütemi kumogo. Paisa linük nung lisopurtem sensaktia ajanshia aoba indang lemsatapa liasü.

Kasa mapang nung sorkari, iba longkak aiba sentong ayongzüka agiba ajanga Nigeria nungertem jenjang tamajungba kümdaktsüsü ta ashiba den, iba mepetmesü ya bentettsü atema mapang talila agütsüsü mepeshia metedaktsüogo. "Mepetmesü atoker aliba mapang nungbo onoki iba ken o ya mebetettsüsü," ta Labour Minister Simon Lalong-i ashi.



**CIRCULAR ROAD BRANCH**  
Ground Floor, Faith Building,  
Near Khermahal Traffic Point,  
Dimapur, Nagaland- 797112  
Email: vjdima@bankofbaroda.co.in

[Rule 8(1)]

**POSSESSION NOTICE (For Immovable Property)**

Securitization and Reconstruction of Financial Assets and Enforcement of Security Interest Act, 2002 aser Security Interest (Enforcement) Rules, 2002, Section 13 (12) Rule 8 kübok **Bank of Baroda Circular Road Branch, Dimapur** indang Authorized Officer ka ama **03.05.2023** nü sen apur

- M/S. BOTOHO SEMA STEEL FABRICATION (Borrower)**  
Proprietor Shri Botoho Assumi, H/No.9, Chekiye Village, 3rd Mile, NH-29, Dimapur- 797112, Nagaland
- MR. BOTOHO ASSUMI (Proprietor)** S/o Kakiho Assumi, H/No.9, Chekiye Village, 3rd Mile, NH-29, Dimapur - 797112, Nagaland
- MR. KASHETO JAKHALU (Guarantor)** S/o Nihoi Jakhalu, H/No.9/130, Hotel Swagat, City Tower, Dimapur - 797112, Nagaland

nung dang parnok apuba sen **16,73,696.00 (Rupees Sixteen Lakhs Seventy Three Thousand Six Hundred Ninety Six Only)** osang agizükba sülen anogo 60 tsüingda aotsü metedaktsür.

Sen apuri sentsüh maotet asünung sen apur aser nübürtem dang Act kübok Section 13, sub section (4) aser Security Interest (Enforcement) Rules 2002 kübok Rule 8 nung tashi agüja aliba dak ajemdaker **2023 kum August 31** nü teküboklen agüja aliba kiojen/ali agiba metedaktsür. Sen apur aser nübürtem dang teküboklen agüja aliba kiojen/ali dang sendakba nung kecha inyaksangshi masütsü metedaktsür, ajita mesüra Bank of Baroda-i sentsüh sen **16,73,696.00 (Rupees Sixteen Lakhs Seventy Three Thousand Six Hundred Ninety Six Only)** aser **25-04-2023** nü nungi tenzüka tetemlok aser tanga charges tem meshitsü.

Sen apur dang Section 13 kübok sub-section (8) dak ajemdaker atakzüka aliba mapang kiojen/ali meyipa agitsü jaoker.

**Kiojen/ali terasa:**

Chekiye Village, 3rd Mile, NH-29, Dimapur nung Mr. Botoho Assumi tenüng nung Patta No. 72, Dag No. 2 / 76, Mouza No. 3, agi ayimjema aliba ali tasazük 1B-4K- 15L kübok kiojen ajak. Arrtsü: **North:** Plot of Shri Hokishe Assumi, **South:** Approach Road, **East:** N.H. 29, **West:** Plot of Shri Khekiho Zhimomi.

Date: 31.08.2023  
Place: Dimapur

Authorised Officer  
(Bank of Baroda, Circular Road Branch)

# ASEAN senden nung 2026 Presidency atema atsütep

**Jakarta, Rongjui/Sept. 05 (Agencies):** Myanmar melen 2026 kum ASEAN mendenpuba inyaksü Philippines renema lir, ta Tir Ferdinand Marcos Jr-i Mongulbarnü ashi, kechiaser iba bloc ya komasür Myanmar mitkar lenirtem den ajurutepa jembishinü akatsü ta atsütepa liasü.

Myanmar nung 2021 kum mitkar temi tashiyim amshia Aung San Suu Kyi sorkar atsingdokba sülen azüdokshi agi sünger mitkar anema nokdaker dak tashiyim amshia arur.

"2026 nung ASEAN Southeast Asian diplomats anati mendenpuba inyaksü Philippines renema lir ta ni sangdonger," ta Marcos-i Association of Southeast Asian Nations lenirtem dang Indonesia yimtiba Jakarta nung ashi.

"Onoki asen community-building' tamendak dak tashi ulishitsü aser ASEAN anitsü," ta pai ashi.

Ajisüaka Manila-i kechiba Myanmar nungi iba tentet mendenpuba rakzükner ajibo Marcos-i mashi.

Iba senden nung adenba

iba onük ya lenirtemi agizükogo, ta ashi.

"Ibai lemtetogo. Lenirtem senden nung sangdongogo aser yangji tai apuba meliasü,' ta diplomat kati pa tenüng mümshia ashi.

ASEAN-i Philippines dang iba küm atema menden agizüksü molunga ali mali ta asüingdanga liasü aser Manila-i agizük, ta ashi.

Taruba kum ASEAN senden nung Laos menden asütsü aser 2025 kum Malaysia menden asütsü.

# Kim Jong Un-i Russia Tir Putin ajurutsü sentong lir

**Seoul, Rongjui/Sept. 05 (Agencies):** Tir Vladimir Putin ajurutsü atema North Korea lenir Kim Jong Un tan ita Russia-i aotsü sentong lir, ta US ketdangsür kati ashi.

Lenir ana ya North Korea-i Moscow nem Ukraine nung raratsü asoshi hadir agütsüsü atema jembishinütsü akok, ta ketdangsüri ashi.

Ajisüaka kong jembishinü ya akatsüar ajibo mejangja.

Kremlin odongtar-i iba osang dak sendakba nung ashitsü kecha mali, ta shia liasü. North Korea nungi sangdong kecha agüja mali.

Kim ya armoured train nung ang jajatsü mesük, ta osang ajanga ashir.

Linük ana tsüingta nok-nü tsütsü jembishinüba nung terenlok aliba osang tasen lir ta White House-i ashiba sülen tena ajuruteptsü akok ta osang ya arur.

National Security Council odongtar John Kirby-i ashiba agi, Russia Defence Minister Sergie Shoigu-i tawa North Korea semdangba mapang Russia dang artillery ammunition ayoktsü Pyongyang mesüzüksü meranga liasü.

Russia-i 122mm aser 152mm shells nungdaksü südi ta bilemer, kechiaser par ket nung yua aliba ajema kumogo, saka North Korea nung artillery indang ajunga mejangjateter.

July ita Kim aser Shoigu tsüingta senden amendang

sayuba nok-nü tem rongnung Hwasong intercontinental ballistic missile dena liasü, aser ibai North Korea indang solid propellants amshiba ICBM mezüngbuba asütsü südi ta amanger.

COVID-19 pandemic sülen bendanger asoshi Kim-i linük kishi lapoktsüba ibai mezüngbuba liasü.

Iba sülen Putin aser Kim tsüingta shiti zülutepa tesendaktep tali akangshitsü nangzüktepa arur, ta Kirby-i ashi.

"DPRK dang Russia den nok-nü indang jembishinüba nungi pilatsü aser Russia nem nok-nü magütsüsü mesüra mayoktsü ta Pyongyang-i yimjak nung sangdonga aliba ama alitsü ajungshir," ta pai ashi.

North Korea-i Russia nem nok-nü agütsüra tenokdangba agütsüba densema temerenshi mera agitsü, ta pai tekumdangtsü ashi.

2019 kum Kim ya train nung Russia anüdoklen Vladivostok tonga aodang lenir ana ya tatemsaba ajurutepa liasü.

Nok-nü ayokba melen North Korea kechi ajangzüksü, ta Washington aser Seoul tebilemtsü akar.

US, South Korea aser Japan lungjemer inyakba ama Shoigu-ia Russia, China aser North Korea lungjemer joint naval drills agitsü onok benoka liasü, ta South Korea indang intelligence service ajanga Hombarnü ashi.



Ukraine yimtiba Kyiv nung cadet lyceum ka nung school tenzüker mezüng anogo tesayur kati lesson sayuba noksa nung angur. Kyiv nung aliba cadet lyceum ka nung Ukraine tanurtem school tenzüko aser school mezüng anogo tesayur aser lanur cadets tem sentong ka agia Russian sepaitem den raradang tepsetba graduates nem akhum agüja minute ka ola madoki süngjema liasü.

## MTLT-i Naga nunger asayartem nem tetushi agütsü

**Mokokchung, Rongjui/September 5 (TYO):** Mokokchung Town Lanur Telongjem (MTLT)-i sangdong ka ajanga, August 28 nü Lumami nung 'Felicitation Programme for Sports Icons' sentong ayongzüka agiba mapang Nagaland University-i Aoe asayar asem nem tetushi agütsüba atema kanga pelaba lemsatepa liasü.

MTLT-isa, Aoe asayar asem aser Chakhesang nunger asayar ka nem tetushi agütsüba atema Nagaland University dang kanga pelaba lemsatepba den iba ajanga state nung saisapong ajungketsü atema ajungmesoba nung teyari agütsüsü ta ashi.

MTLT-i ashiba agi, Bendagakum (Kung-fu & karate), Mongsen (Wushu & kung-fu) aser Longtsukumba (Mixed Martial Arts) nungeri combat sport nung parnok asaya nung temaba jenjang tongteta asayaago. Parnoki küm aika bendanga agüja asayaba ajanga state, national aser international jenjang nung takok tajung ngutetogo.

Anungji Nagaland University-i parnok takok tajung reprangteta tetushi agütsüba ajanga kanga nema adanger aser Ao kin nem



konang tetushi bener arutsüba atema asayartem nem teningsang agütsür, ta MTLT-isa metetdaksü.

MTLT-isa, lokti nung saisapong benoktsü atema ajungshia aruogo aser Telongjem züngsemtem aika district kübok sport associations tem nung ketdangsurtem lir ta ashi.

Maneni district nung mapang tatsüka saisapong nung temulung magütsü aliba tang asendenshir tanem tanemi temulung agüja aoba ngua kanga pelaba aser tsürapurtemi nongita yaria lanur asayartem parnok kakat shisatsü bushiba den külemi asaya balala nung jangrabangra shilem agiba ngua kanga pelaba MTLT-i lemsatepa liasü.

Tawa district nung Basketball Association Mokokchung District (BAMD), the Mokokchung District

Taekwondo Association (MDTA) aser Boxing Association Mokokchung (BAM) asüngsashiba indang lemsatepba den MTLT-i sports association aser asayartem dang tama purtemi takok tajung anguba ajanga ajungmesor district aser kin asoshi konang tetushi tali bener arutsüsü ajungshia liasü.

Kasa mapang nung MTLT-i, district nung saisapong asüngsashitsü atema ken o dak sendaka aliba ketdangsurtem dang süoki ia agitsü asoshi mepeshia metetdaksüogo. Talisa parnoki District Officer of the Department of Sports & Youth Resources aser Mokokchung District Sports Council (MDSC) dang lanurtem temaba jenjang tongtetsü atema inyaksangshiba mapang tom nung tezüdanger manendaktsüsü atema tenüngdakba teyari agütsüsü mepeshia liasü.

Maneni MTLT-i, lanur asayartem nongita yaritsü tenangzüka agütsüba den pei shimba asaya nung temaba jenjang tonga asayatsü atema ajungshia liasü, ta MTLT tir Imnaonen Pongen aser General Secretary Imkongchuba nati külem sangdong ka ajanga metetdaksü.

## ISL 2023-24 September 21 nü tenzüksü

**Rongjui/September 5, 2023 (Agencies):** 10buba Indian Super League September 21 nü tenzüksü. Mezüngbuba anogo Kerala Blasters FC aser Bengaluru FC na asayatsü.

Linük indang top-flight domestic league season tasenba ya Kochi kübok Jawaharlal Nehru Stadium nung asaya-a tenzüksü.

Mezüngbuba asaya ya taoba season semifinal asaya den kasa asütsü, kong KBFC pur asaya tom nung tugatok aser ibayongji BFC nem takok agüja liasü.

Sunil Chhetri-i goal ka idaktsüba sülen KBFC coach Ivan Vukomanovic-i par team dang ground toktsür aotsü asoshi tetuyuba agütsü, kechiyong Serbia nunger coach yagi referee-i telemtetba agiba ya khenyongi tim masü ta bilem. Iba jenjang agiba atema coach nem tenokdangba agütsüogo aser pa asaya 10 nung shilem magitetsü.

Defending Champions Mohun Bagan Super Giant, shirnoki anogo ishika tejakdang Durand Cup kokogo, parnoka

team tashi tait ka kümogo kong bendanger asayar Jason Cummings aser Armando Sadiku amala densema lir aser India nunger asayartem rongnungia Anwar Ali, Anirudh Thapa aser Sahal Abdul Samad nunger amala asayar tajungtem anisema lir.

Season tasenba nunga Juan Ferrando-i junga asayatsü bilema alitsü aser kasa mapang nung Mumbai City FC coach Des Buckingham-ia taoba season dang nungi team tajungba ani takumbo takok marok angutsü atema bilema alitsü.

Kasa mapang nung Punjab FC pur taoba I-League season nung kanga junga asayaba sülen ISL nung asayatsü asoshi maongka ngutetogo. Parnok taküm mezüngbuba ISL nung asayatsü lir aser junga asayatetsü imla atar.

Chennaiyin FC aser English manager Owen Coyle na tenangzüktepba yanglushiogo aser pa lenisüba nung team-i season kanga tashi ita tenzüka takok nung tembangtsü imla atadar.

## Mustafa Hajrulahovic asayamung atema India team sangdongogo



Manish Kaushik

**Rongjui/September 5, 2023 (Agencies):** World Championships nung bronze medal ana tashi ngur aliba asayar Manish Kaushik-i anir India nunger boxer 11 Bodhbarnü nungi tenzüka Bosina and Herzegovina kübok Sarajevo nung 21buba Mustafa Hajrulahovic Memorial tournament nung asayatsü.

Boxing Federation of India-i Mongolbarnü sangdongba India team nung tebur trok aser tetsür pongu densema lir.

2019 aser 2021 World Championships bronze medalist Manish Kaushik (63.5 kg) dak alia tebur team nung Akash Kumar (57 kg), Satish Kumar (92+ kg), Naveen Kumar (92kg), Barun Singh (51 kg) aser Nikhil Dubey (71 kg)

nunger densema lir. Tetsür asayartem ya 2019 World Championships silver medallist Rani-i (50 kg) anir asayatsü, kong youth world champions Jyoti (54 kg) aser Shashi Chopra (60 kg), Vinakshi (57 kg) aser Jigyasa Rajput (75 kg) nunger densema lir.

Iba asayamung ya September 9 nü tembangtsü.

### India team:

**Tebur:** Barun Singh Shagolshem (51 kg), Akash Kumar (57 kg), Manish Kaushik (63.5 kg), Nikhil Premnath Dubey (71 kg), Naveen Kumar (92 kg), Satish Kumar (92+ kg).

**Tetsür:** Manju Rani (50 kg), Jyoti (54 kg), Vinakshi (57 kg), Shashi Chopra (60 kg), Jigyasa Rajput (75 kg).

## World Cup atema India squad sandongogo

**India squad for ICC World Cup 2023:** India captain Rohit Sharma aser selector mendenbuba Ajit Agarakar nati Mongolbarnü ICC Cricket World Cup 2023 atema asayar 15 agi kümetetba India squad sangdongogo.

Iba asayamung ya October 5 nungi tenzüka India nung asayatsü aser India team Sharma lensiba nung asayatsü aser Pandya vice captain asütsü shimogo.

Shubman Gill, Virat Kohli, Shreyas Iyer, Hardik Pandya, Ravindra Jadeja, Kuldeep Yadav, Mohammad Shami, Jasprit Bumrah aser Mohammad Siraj nunge kecha tatidaksü makai shimogo, saka middle-order atema tebilemtsüka-a

sensaksema aruogo.

Iyer temang anema akümba sülen team nung züngoksemogo aser Suryakumar Yadav-a backup ama shimogo. Ishan Kishan-i ODI nung kanga junga asaya aruba ajanga pai Sanju Samson ajatetogo aser pa Rahul melena asayatsü akok.

Asia Cup ama India-i off-spinner meshimtsü asoshi telemtetba agi aser Kuldeep, Jadeja aser Axar Patel ta left-arm spinner asem shimogo. Fast bowler tem rongnung Bumrah, Shami aser Siraj densema lir aser parnok asem nem seam bowling allrounder Pandya aser Shardul Thakur nati teyari agütsüsü.

Asia Cup squad nungi pacer Prasidh Krishna aser left-

handed middle-order batsmen Tilka Verma na team nung mezüngoksem.

### World Cup atema India team yamai alitsü:

Rohit Sharma, Shubman Gill, Virat Kohli, Shreyas Iyer, Ishan Kishan, KL Rahul, Hardik Pandya (VC), Suryakumar Yadav, Ravindra Jadeja, Axar Patel, Shardul Thakur, Jasprit Bumrah, Mohammed Shami, Mohammed Siraj, Kuldeep Yadav

India team iba asayamung nung mezüngbuba Australia den October 8 nü Chennai nung asayatsü aser iba sülen Afghanistan den October 11 nü Delhi nung asayatsü. India aser Pakistan na asaya October 15 nü Narendra Modi Stadium, Ahmedabad nung asayatsü.

## West Ham United-i defender Konstantinos Mavropanos alizükogo

**Rongjui/September 5, 2023 (Agencies):** West Ham United-i taoba mapang Arsenal defender Konstantinos Mavropanos, VfB Stuttgart nungi alizükogo aser pa den küm pongu atema tenangzüktepba ka yangluogo, ta Premier League club yagi sangdong ka ajanga metetdaksü.

Pa sen kwi agi alizük iba indang osang tejangja magütsü ajsüka British media sangdong balala ajanga ashiba agi, pa pound million 17 agi

alizük aser iba den add-ons million ana densema lir.

2020 küm Arsenal nungi loan nung aoba sülen Mavropanos, Stuttgart nungi 89 ben asayaago. Iba süen pa taoba season Stuttgart den teti atema tenangzüktepba ka yanglua liasü.

"Premier League-i tanaben meyipa arua West Ham United nungi asayatsü atema maongka anguba atema kanga pelar," ta pai ashi.

"Taoba season Conference League akokba sülen lig nung

adentsü tang jangrademtsü mapang ka lir aser kü indang career nung taruba jenjang ka agitsü atema yongya atar. Ni takokba tashi meranga asayatsü ta fan tem nem tenangzüka agütsür," ta paisa ashi.

Mavropanos ya Arsenal indang academy nungi anitetba asayar ka lir aser pa Greece team nungi tanga tashi nung 19 ben asayar lir aser pa World Cup aser European Championship qualifiers tem nung asayatsü maongka ngua asaya arudar.

## BILEMDANGANG

"Azümener asoshi mapa ka danga tetemsü masü."